



Chel cjâf lu cjalave ta chê sere che lis faliscjjs si alçavin sù dal bidon: un grant cjâf di purcit cu la piel tindude su la ristielerere.

“No sta preocupâti, o varai la mê vendete!”

Zorç al fasè un salt pe maravee e pe pôre. I pareve che il purcit i fevelàs! Une vôs che e vignive dal di dentri, di Zorç stes, ma che il frut al identificave come che e fos chê dal purcit!

Te matine Svualt e Meni a jerin vignûts tal cjasâl; copade la besteone cu la pistole apueste pontade tal cjâf... spelade la puare bestie e trasformade in salams, musets, sanganei...

Po a jerin partîts par une altre mission, un altri purcit di copâ... lontan... ai cunfins cul Venit. Svualt e Meni a jerin i miôrs.

“No sta preocupâti, o varai la mê vendete!”... la frase e sameave fâ un rivoc te ment dal frutin Zorç.

L’indoman, tor sere, e rivà la notizie cul gjornâl radio. Il nono nol rivave a crodi: “Puars zovins, ce brute fin! A vevin lavorât cussì ben ca di nô... juste îr...”

La machine cui doi becjàrs e jere lade a sbati intune fracassine su la A4; scugnût clamâ i pompîrs a tirâ fûr ce che al restave...

“NORCINI FATTI A PEZZI SULLA A4” al scriveve il gjornâl la dì dopo... a caratars cubitâi...

E Zorç alore al pensà: la bestie e à vût la sô vendete... a vevin di lâ a purcitâ... a son stâts purcitâts lôr.

**di Checo Tam**